

# INUIT ATAQATIGIIT

## Inatsisartuni



UKA2019/Imm. 25

10. oktober 2019

Sofia Geisler

**Uunga siunnersuut: Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. xx, xx. xxx 2019-imeersoq.**

(Aatsitassanut Suliffeqarnermullu Naalakkersuisoq)

Suliffeqarnikkut peqataanikkut inuiaqatigiinni nalilinnik pilersitseqataanermut Nunatsinni inuit amerlanerpaat peqataanissaannut piginnaasat pigisat qaffassarneqartuarnissaannut iliuuserineqartut suulluunniit Inuit Ataqatigiinniit tapersorsorpagut. Taamaattumik siunnersuut una Aatsitassanut Suliffeqarnermullu Naalakkersuisumit qaqqinneqartoq, sulisoqarnikkullu immitsinnut pilersorsinnaalernissatsinnut anguniagaqarnitsinnut sunniuteqartunik, siunissamilu sunniuteqartussanik, pingaarutilinnik arlalinnik imalik akerliuffigiuminaappoq.

2018-ip ukiaanerani naatsorsuinerit malillugit suliamik ilinniagaqartut 713-it suliffeqarfinit amigaatigineqarput. Ilisimavarput ukiuni aggersuni 17-it 29-llu akornanni ukiullit ikiliartuinnartussaannerat. Taamaattumik Inuit Ataqatigiinniit isumaqatigilluinnarparput inuussutissarsiutigalugu ilinniakkamik atuaqatigiianni aallartittut amerlanerpaat naammassisarnissaasa qanoq pingaaruteqartiginera.

Taamaattumik aamma aallartitsisimasut atuarnerminnik taamaatitsiinnartarnerat, 2018-imi 50 procentimiittoq, malunnaatilimmik appartittariaqarparput, tamannalu inunni ataasiakkaani, ilinniarfimmi sulisitsisunilu namminermit kiisalu taakku akornanni suleqatigiinnikkut anguniagassaavoq.

Siunnersuut manna aqqutigalugu anguniarneqarpoq pisortat suliffeqarfiillu akornanni attaveqatigiinnerup eqaannerulernissaa, taamaasilluni ilinniartut sungiusartullu amerlanerit suliffeqarfinni periarfissaqareersuni sulisorineqalernissaat siunertarineqarluni.

Inuit Ataqatigiinniit qularutiginnilarput suliffeqarfiit inissatigut aningaasatigullu periarfissaqartut kissaateqartut ilinniartunik sungiusartunillu amerlanerusunik tigusinissaminnut. Kaammattuutigissavarpulli qulakkeerneqassasoq siunnersuut manna allaffissornikkut suliassaqarnerulersitsinermik pilersitsissanngitsoq, pingaartumik suliffeqarfiit sulisunik aqutsinermut immikkoortortaqqarfeqqanngitsut eqqarsaatigalugit. Aaqqiisuussineq allaffissornikkut pisariitsumik isumagisassaasariaqarpoq.

Siunnersuutikkut ugguuna ersarissumik saqqumminngitsoq tassaavoq siunnersuut manna aqqutigalugu ilinniartut sungiusartullu qanoq amerlanerulertiginissaannik Naalakkersuisut anguniagaqarnersut. Ilinniartut sungiusartullu ullumikkut qassiuppat? Ukiut marluk qaangiuppata qanoq amerlassuseqalernissaat Naalakkersuisut anguniarpaat?

Naalakkersuisut saqqummiussaanni aamma erserpoq sungiusartut ullumikkut tiguneqartartut amerlanerusinnaanginnerannut pissutaasoq aneqq tassasoq kollegiani inissat amigaataanerat, illoqarfinni atuarfiit brancheskolit inissisimaffiini, tassanilu pineqarput ilinniarsiit 58-isut ilaat 15-it.

Ilinniarsiit Pilersaarut naapertorlugu ullormernit amerlanerusut kollegiani inissat 2022-ip kingorna aatsat naatsorsuutigisinnalissavagut. Taamaattumik Naalakkersuisunut apequtigerusunnarpoq siunnersuutit uuma saqqummiunneqartup sunniutai qaqugu malugissanerigut takorloorneraat, peqatigisaanik kollegiani inissat amerlanerusut pilersinneqanngippata.

Pingaartumik Nuummi Ilulissanilu suliffeqarfinit maanna amigaatigineqarput ilinniartut sungiusartullu, sumiiffinnilu taakkunanik kollegiani inissat 2022 sioqqullugu amerlanerulernissaannut Naalakkersuisut qanoq pilersaaruteqanersut Inuit Ataqtigiinniit paaserusupparput.

Maannakkut siunissamilu inuiaqtigiinni atorfissaqartippagut sulisussat amerlanerusut. Ilisimavarput inuusuttut 2000-it paallingajallugit amerlatigisut sumiluunniit nalunaarsorneqanngitsut. Ilisimangilarput sumiinnerisut, sumik ilinniagaqarsimanersut qanorlu inuuniuteqanersut. Tamanni inissaminiingilaq. Taakkuupput sulisussat ullumikkut siunissamilu aamma atorfissaqartitagit. Taakku sumiissusersinissaannut Naalakkersuisut sulinerat sumut killippa? Pineqartut piginnaangorsaanikkut qanoq atorfissaqartitsinerat qulaajassallugu Naalakkersuisut qanoq pilersaaruteqarpat?

Inuusutissarsiutigalugu ilinniartitaanernut amerlanerit pulatinnissaat eqqartortillutigu, taamalu sulisoqarnikkut immitsinnut pilersorsinnaanissatta anguniarnera sammitillutigu, Inuit Ataqtigiinniit tupigusuutigivarput piginnaangorsaanermut aningaasaliissutit Aningaasanut Inatsisissatut 2020-imut siunnersuummi konto 670202-miittut sipaarfigineqarnissaat Naalakkersuisut siunertarimmassuk.

Ilisimavarput 16-it 74-llu akornanni ukiullit 60 procentii sinnerlugit meeqqat atuarfiannik kisimi tunuliaqutaqarmata, taamaattumik piginnaangorsaanerit taamalu suliffissanut assigiinngitsunut pisariaqalernerani pulaniarnissamut tunngavissagissaarnerulernissamik aamma siunertaqarluni piginnaangorsaanerit atortariaqarsorigatsigit, piginnaangorsaanikkut sipaaruteqarniarneq inissaminiingilaq, taamaaliornikkut maanngaaniit takutissagatsigu piginnaangorsarneq pingaartinngikkippat.

Taamatut oqaaseqarluta siunnersuut ataatsimiititaliamut susassaartumut suliarineqartussanngorlugu innersuupparput.